

## И абие поем трипеснец,

творение господина Космы: ирмосы по дважды, тропари на 12. Последи же ирмос оба лика вкупе. Акrostихис, или краегранесие трипеснца есть: Просавватон те: еже есть, Предсубботие же. Глас 6.

### Песнь 5

**Ирмос:** К Тебе утренюю,/ милосердия ради Себе истощившему не преложно/ и до Страстей/ безстрастно преклоншемуся, Слове Божий,// мир подаждь ми падшему, Человеколюбче.

Умывше ноги и предочистившеся таинства причащением Божественного ныне, Христе, Твоего, служителие от Сиона на Елеонскую гору великую с Тобою въздоша, поюще Тя, Человеколюбче.

Зрите, рекл еси, друзи, не бойтеся: ныне бо приближися час яту Ми быти и убиену рукама беззаконных: вси же расточитеся, Мене оставивше, ихже соберу проповедати Мя, Человеколюбца.

**Катавасия тойже.**

### Кондак, глас 8:

Нас ради Распятого, приидите, вси воспоем,/ Того бо виде Мариа на древе, и глаголаше:/ аще и распятие терпиши,// Ты еси Сын и Бог Мой.

**Икос:** Своего Агнца Агница зряци к заколению влекома, последоваше Мариа простертыми власы со инеми женами, сия вопиющи: камо идеши, Чадо? Чесо ради скорое течение совершаеши? Еда другой брак паки есть в Кане Галилейстей, и тамо ныне тщишися, да от воды им вино сотвориши? Иду ли с Тобою, Чадо, или паче пожду Тебе? Дажь Ми слово, Слове, не молча мимоиди Мене, Чисту соблюдыи Мя: Ты бо еси Сын и Бог Мой.

### Песнь 8

**Ирмос:** Столп злобы богопротивныя,/ божественнии отроцы обличиша:/ на Христа же шатающееся беззаконных соборище/ советует тщетная,/ убити поучается живот держащаго дланию:/ Егоже вся тварь благословит,// славящи во веки.

От веждей учеником ныне сон, рекл еси, Христе, отрясите, в молитве же бдите, да не в напасть внидете, и наипаче Симоне: крепчайшему бо болий искус. Разумей Мя, Петре: Егоже вся тварь благословит, славящи во веки.

Скверна слова устен, никогдаже изреку Тебе, Владыка, с Тобою умру яко благоразумен, аще и вси отвергнутся, возопи Петр. Ни плоть, ниже кровь, но Отец Твой откры ми Тя: Егоже вся тварь благословит, славящи во веки.

Глубину премудрости Божественныя и разума не всю испытал еси: бездну же Моих судеб не постигл еси, человече, Господь рече. Плоть убо съй, не хвалися, трижды бо отвержешися Мене: Егоже вся тварь благословит, славящи во веки.

Отрицаешися, Симоне Петре, еже сотвориши скоро, якоже речеса, и к тебе отроковица, едина пришедши, устрашит тя, Господь рече. Горце прослезив, обрящеши Мя обаче Милостива: Егоже вся тварь благословит, славящи во веки.

### Песнь 9

**Ирмос:** Честнейшую Херувим/ и славнейшую без сравнения Серафим,/ без нетления Бога Слова рождшую, // сущую Богородицу, Тя величаем.

Пагубное соборище богомерзских, лукавнующих богоубийц сонмище, предста, Христе, Тебе, и яко неправедника влечаше Зиждителя всех, Егоже величаем.

Закона не разумеюще нечестивиц, гласом пророческим поучающесе вотще, яко овча влечаху Тя, всех Владыку, неправедно закалати, Егоже величаем.

Языком изданную жизнь, с книжники убити священницы предаху, уязвлен и самозавистною злобою, естеством Животодавца, Егоже величаем.

Обыдоша яко пси мнози и удариша, Царю, ланиту Твою заушением, вопрошаху Тя, Тебе же ложна свидетельствовваху: и, вся претерпев, всех спасл еси.

### Таже ексапостиларий, трижды:

Разбойника благоразумнаго во едином часе раеви сподобил сей, Господи, и мене древом крестным просвети и спаси мя.

Таже Евангелие 9-е, от Иоанна, зачало 61: Во время оно стояху при Кресте Иисусове: **Конец:** Воззрят Нань, Егоже прободоша.